

## Uunga siunnersuut:

### **Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaata allanngortinnera pillugu**

#### **Inatsisartut inatsisaat**

(Silap pissusianik pissuteqartumik ajornartorsiornerni ajunaarnersuarnullu assingusuni pisuni aallarteqqinnissamut tapiissutisisinnaaneq, akiliutigineqartartut qaffanneri kiisalu qinnuteqarnermi piffissaliussat eqqunneqarneri)

## § 1

Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaanni nr. 3, 21. maj 2004-meersumi imatut allannguisoqarpoq:

1. § 1 imatut oqaasertalerneqarpoq:

” § 1. Inuussutissarsiutigalugu aalisartunut, inuussutissarsiutigalugu piniartunut inuussutissarsiutigalugulu nunalerinermik ingerlataqartunut pigisat ajoqusernerisigut imaluunniit ukuningga peqquteqartumik inuussutissarsiutiminnut tunngatillugu annaasaqarsimasunut Naalakkersuisut aallarteqqinnissamut tapiissuteqarsinnaapput:

- 1) pigisat ajoquserneri,
- 2) inuussutissarsiummut tunngasut tammarneri,
- 3) atortut nungullarneri,
- 4) ilungersunartumik napparsimaneq allatigulluunniit timikkut peqquteqartumik sulisinnaajunnaaneq uppersarsarneqartoq, imaluunniit
- 5) inuussutissarsiornikkut nalinginnaasumik akornuteqarneq assigisaaluunniit.

*Imm. 2.* Silap pissusaata allanngorneranik allatigulluunniit ajunaarnersuarmik pisoqarneranik peqquteqartumik inuussutissarsiornikkut isertitat tamakkiisut imaluunniit annertuut sivikitsumik ilimasaarneqarnikkut annaaneqarpata imm. 1, nr. 1-5-imi taaneqartut saniatigut imm. 1-imi taaneqartunut inunnut aningaasatigut Naalakkersuisut ikiuussinnaapput.

*Imm. 3.* Imm. 1-2-mi pisunut uppersarsaanissaq pillugu Naalakkersuisut sukumiinerusumik malittarisassanik aalajangersaasinnaapput.

2. § 2 imatut oqaasertalerneqarpoq:

” § 2. Aallarteqqinnissamut tapiissutit tunniunneqarnissaannut piumasarineqarsinnaavoq § 1-imi ilaasut pisut matussuserneqarsimassanngitsut imaluunniit nammineerluni pisortalluunniit sillimmasiinerinit matussuserneqarsinnaanngitsut.

*Imm. 2.* Ajoqusernissaq sioqqullugu qinnuteqartoq nammineerluni sillimmasiinissamut nammineq pisariaqartunik aningaasaqarsimanngitsoq nalilerneqarpat Naalakkersuisut immikkut pisuni aallarteqqinnissamut tapiissuteqarsinnaapput.”

**3. § 3** imatut oqaasertalerneqarpoq:

" **§ 3.** Aallarteqqinnissamut tapiissutinik qinnuteqaat Naalakkersuisunut tunniunneqassaaq.

*Imm. 2.* Imm. 1 malillugu qinnuteqaat ajoqusernerup imaluunniit tammannerit pineranniit kingusinnerpaamik ullut 30-it kingorna, Naalakkersuisunit suliarineqarsimasoq qinnuteqaateqarnermut immersugassaq atorlugu, tunniunneqassaaq , tak. § 1, imm. 1, nr, 1-2.

*Imm. 3.* Imm. 1 malillugu qinnuteqaammut qinnuteqartup aningaasaqarnikkut inissisimaffia pillugu uppersaat kiisalu inuussutissarsiornermut attuumasumik annaasaqarneq pillugu uppersaat ilaatinneqassaaq, takuuk § 1.

*Imm. 4.* Aallarteqqinnissamut tapiissutit sapinngisamik soqutigisaqaqatigiit kattuffiat susasaqartoq tusarniaavigereerlugu tunniunneqartassapput. § 1, imm. 1, nr., 5, § 1, imm. 2 aamma § 4, imm. 2-mi pisuni taaneqartuni soqutigisaqaqatigiit kattuffiat tusarniaavigneqartassaaq."

**4. § 3-p** kingorna ikkunneqarpoq:

" **§ 3 a.** Aallarteqqinnissamut tapiissutit qinnuteqaammik aalajangersimasumik naliliineq tunuliaqutaralugu tunniunneqartassapput, tassunga ilanngullugu aallarteqqinnissamut aningaasartuutit akilernissaannut qinnuteqartoq nammineq naammattunik aningaasaateqarnersoq.

*Imm. 2.* Ajoqusernerit tammartullu uteqqinneqartut eqqarsaatigalugit, tak. § 1, imm. 1, nr. 1-2, tunniussinnermiit siusinnerpaamik ukiut pingasut qaangiunneranni aallarteqqinnissamut tapiiffigineqarnissaq pillugu qinnuteqartoqarsinnaavoq."

**5. § 4,** ima oqaasertalerneqarpoq:

" **§ 4.** Aallarteqqinnissamut tapiissutit minnerpaamik 2.000 kr. annerpaamillu 50.000 kr. ataasiaannarluni tapiissutaapput, taamaattorli tak. imm. 2.

*Imm. 2.* Naalakkersuisut aallarteqqinnissamut tapiissutit tunniunneqarnerannut piumasarisinnaavaat tapiissutit qanoq atorneqarnerat pillugu kingornatigut qinnuteqaateqartoq nassuiaateqassasoq."

**6.** Inatsimmi tamarmi "Landsstyre" imatut allanngortinneqarpoq: "Naalakkersuisut".

## § 2

Inatsisartut inatsisaat ulloq 1. januar 2025-mi atuutilissaaq.

## Naalakkersuisut Siulittaasuat